



大清文宗協天翊運執中垂謨懋德振武聖孝淵恭端仁寬敏
顯皇帝實錄卷之二十八

咸豐元年辛亥二月癸酉諭軍機大臣等已革提督閔正鳳
前在廣西遷延誤事有無別項劣蹟曾有旨令李星沅徐廣
縉查明具奏徐廣縉業經奏到現據兵部奏該革員到京已
交刑部聽候查辦著李星沅遵照前旨即將閔正鳳及已革
總兵盛筠貽誤各款並有無別項劣蹟確切查明迅速由驛
具奏以憑覈辦將此諭令知之○以堵築直隸永定河漫工
出力開復革職道員熊守謙等處分賞知縣喬綏福等藍翎
餘升敘有差○旌表守正捐軀直隸甯津縣民王立名妻蔣

氏○甲戌○

上詣

壽康宮問

皇貴太妃安○乙亥諭內閣。顏以燠覆奏。遵查十字河西隄改
挖新河。窒礙難行。並繪圖呈覽一摺。據稱事無把握。流弊較
多。不能計及久遠。自無庸輕議更張。惟十字河為漕船經由
要地。該河督務當督飭員弁。循照舊章。隨時搶撈。俾重空軍
船。往來暢行。並飭認真挑挖。囊沙引渠。俾免淤墊。儻有阻淺
遲誤。惟該河督是問○戶部議覆兩江總督陸建瀛等奏。江
蘇清查倉庫虧墊確數一摺。江甯藩司所屬。共虧銀二十二

萬六千有奇。蘇州藩司所屬。共虧銀四十八萬五千有奇。俱
係有著之款。請飭嚴追從之○丙子春分朝

日於東郊。遣莊親王奕仁行禮○

上詣

壽康宮問

皇貴太妃安○諭內閣。步軍統領衙門。會同倉場侍郎。遵議稽
查防範倉儲章程。均著照所擬辦理。惟太平萬安二倉。西面
俱附城牆。仍恐賊匪由城上釣桶為奸。著步軍統領衙門。嚴
飭城門領等。隨時加意防範。並著查城王大臣一體認真稽
查。總期倍加嚴密。毋得再有疏虞。至京通各倉值宿監督。由

倉場侍郎責令無分晝夜。不時稽查。如有曠誤。即著從嚴叅辦。○戶部奏。官兵補領米折銀一項。請照舊章。仍支本色。得旨。務使旗員補領此項米石。均霑實惠。斷不可徒飽胥役也。○改鑄浙江桐鄉縣知縣印信。從巡撫吳文鎔請也。○丁丑。諭內閣。廣西匪徒。滋擾各郡。前經降旨。將提督閔正鳳革職。諭令李星沅。徐廣縉。嚴查該革員。並已革總兵盛筠。貽誤各情。茲據李星沅。徐廣縉。查明覆奏。閔正鳳。身任提督。全省營伍。皆歸統制。乃於賊匪在府城外。肆行搶劫。並不親往督捕。迨官兵打仗。陣亡多人。仍未渡河救應。賊首陳亞潰。肆擾修仁。荔浦等縣。被兵擊走。閔正鳳。時在象州。並不扼要堵截。幾

至賊首漏網。似此養癰貽患。退縮無能。若不立予重懲。何以勵將材。而作士氣。閔正鳳。著即發往新疆。充當苦差。此時兩粵。正當勦捕緊要之時。如有身歷戎行。有心玩誤。該大臣等。嚴查叅奏。必當立正刑誅。以肅軍律。寬典不能倖邀也。至已革左江鎮總兵盛筠。平日訓練無方。臨事又多貽誤。本應一併發遣。現已病故。著無庸議。○諭軍機大臣等。據李星沅。周天爵。奏。廣西省大兵均駐潯郡。南太各路。酌派防勦。並咨會廣東。一體堵拏等語。潯屬金田會匪。勦辦尚未得手。官兵齊集該處。南太二府。地居上游。鞭長莫及。盜匪愈形猖獗。現在廣東提督陶煜文。帶兵馳勦廉州一帶。若粵西無重兵合勦。

勢必北竄蔓延。各股糾結屯聚。益恐難制。前聞會匪與盜匪不相聯絡。如果金田匪徒負嵎堅拒。一時難以撲滅。而南太盜匪日熾。上游兵力單弱。不免顧此失彼。於大局深為有礙。兵機操縱變化。不可執一。諒李星沅周天爵定能通籌全局。酌量緩急。一面會同向榮督率潯州大兵。廣設方略。確查賊首蹤跡。或誘令離巢。或乘其不備。將該處大股逆匪迅速剷除。一面嚴飭鎮將等督率兵勇。將太平近邊土司一帶賊匪相機勦捕。如有欽州靈山各處匪徒被廣東徧勦竄入。即行會合堵截。勿任逃竄十萬山一帶。致難搽捕。如該處兵力不敷。仍遵前旨。酌量調撥援應。勿誤事機。總之東西二省境界。

毗連。匪徒奔突竄擾。難分彼此。李星沅總統戎行。固可便宜從事。徐廣縉統轄兩省。亦屬責無旁貸。務當與周天爵向榮等協力同心。會商合辦。於撥餉調兵。有應彼此通籌之處。均應不分畛域。推誠相與。一以國事為重。庶幾速殄賊氛。太平等處均有通越南之路。儻賊匪由土屬竄逸。迫近該國。該大臣等應即豫先行文知會越南國王。告以土匪情形。令其自行保衛。以免越境滋擾。至廣西客兵雲集。待餉孔殷。前諭徐廣縉續撥廣西軍餉。現解十萬兩。務即湊足三十萬兩。速解濟用。勿誤急需。將此由四百里各諭令知之。○戊寅。

上詣

壽康宮問

皇貴太妃安。○以正白旗滿洲副都統德興。署正黃旗漢軍副都統。正藍旗蒙古副都統巴雅爾。署正藍旗漢軍副都統。○已卯諭內閣。上年冬至以後。雪澤稀少。氣候頗形乾暵。入春來冷煖不時。昨已節過春分。密霰凝寒。本日始放暄霽。朕念切民依。時時返躬內省。深恐措施未當。不能上感天和。去冬禮部彙題烈婦一本。朕以向來烈婦夫亡無偏迫等情。遽行殉節者。例不准旌。雍正年間。

聖諭煌煌。原於維持風化之中。寓愛惜民命之意。並經內閣照例票擬雙籤呈進。遂用不必旌表之籤發下。迄今事後追思。

該烈婦等身殉其夫。舍生取義。究屬人所難能。而各省歲終彙題。不過二三十人。未必遽開輕生之漸。若給予旌表。亦足以激薄俗而勵綱常。所有上年禮部彙題各直省夫亡殉節之烈婦彭氏等三十七口。仍著准其一體旌表。以慰貞魂。該部即遵諭行。○諭軍機大臣等。昨有旨諭李星沅等。廣西大兵均駐潯州。其南太一帶。界連高廉。深恐兵力單弱。不能扼要堵截。已飭令該大臣等。通籌全局。派兵防勦矣。因思重兵雲集。統率需人。將領難資分遣。上游地方。文武控制維艱。防勦稍疏。所關非細。本日已特降諭旨。令廣州副都統烏蘭泰。馳赴廣西。幫同該大臣等。辦理軍務。並令湖北鹽法道姚瑩。

馳往軍營。交該大臣等差遣委用。該二員到後。應如何協勦分防之處。著該大臣等相機商辦。庶期布置周密。不致顧此失彼。石江鎮總兵惠慶。右江道慶吉所屬賊匪肆擾。自上年以來。並未聞該鎮道如何調度。是否株守偏隅。一籌莫展。著該大臣等迅即查明。據實具奏。該省前後撥解餉銀。不下百餘萬兩。軍需總局。責任綦重。現又分局設捐。經理皆須得人。勞崇光職任藩司。自應統籌一切。第支應紛繁。非得廉明公正之員幫辦。恐稽查未周。致滋冒混。務當分委賢員。協同妥辦。責令實心經理。其各路分局。亦必須委用得人。庶免濫應侵欺等弊。頃有人奏。署桂林府廉良澤貪鄙狡猾。工於趨承。

鄭祖琛受其欺蒙。若如所奏。令其辦理糧臺。必致貽誤。該大臣等留心察看。儻有劣蹟。即行叅辦。將此由四百里諭知李星沅。周天爵。向榮。並傳諭勞崇光知之。○又諭廣州副都統烏蘭泰。向於火器最為留心。如有製造得用各器械。著烏蘭泰酌量帶往廣西軍營。以資運用。其平素操練得力之章京兵丁。亦准酌帶數人。一併馳驛前往。將此由四百里諭令穆特恩。徐廣縉。並諭烏蘭泰知之。○又諭裕泰奏。現到閩浙總督新任。沿途疊奉廷寄。交查已革巡撫陳阡叅款。及神光寺夷情。現在逐案查辦等語。陳阡被叅江西吉安府任內各款。業經查明。降旨革職。聽候查辦。其被叅福建知縣任內。營求

欽博各情。務須確切訪查。據實叅奏。不得以業經革職。稍涉將就。至神光寺二夷人。搬至道山觀內。又據該督查明烏石山下馬巷邊地方民房。亦有租給夷人居住行醫之事。究竟城內山上。夷人共有若干。其山下是否尚有夷人居住。著裕奉詳細查明。妥為控馭。既不可操之過急。激成事端。亦不可示以寬柔。漫無限制。其應如何開導。諭令遷徙之處。總在該督相機應變。庶於安民撫夷。各得其宜。再喚夷在閩買房釘礮各節。及劉韻珂徐繼畲頻年辦理。有無錯誤。著該督仍遵歷次諭旨。確切查明。據實覆奏。毋得稍有不實不盡。將此諭令知之。○閩浙總督裕奉奏報到任日期。得旨。心期誠事。期

當視國事如家事。夫奚有遷就瞻徇。勉之誌之。又批。不可空言了事。惟期慎終如始。○庚辰。諭軍機大臣等。穆騰額。鄂順安。奏廓爾喀王懇請遣使朝貢一摺。廓爾喀王請進登極表貢。情詞懇切。自應准其恭進。惟來年即係該國例貢之期。所有呈進表貢。著令其統俟咸豐二年例貢時。一同恭齎來京呈進。以省跋涉之勞。穆騰額等。即檄諭該國王欽遵辦理。將此諭令知之。○命江蘇淮揚道嚴正基。馳赴廣西。交欽差大臣李星沅等差委。○辛巳。

上御箭亭。閱十五善射。翼日如之。○諭軍機大臣等。李星沅等奏。進攻金田大股逆匪。屢獲勝仗。並遵查賊匪股數名目。添

調精兵協勦各一摺。又片奏各屬勦匪獲犯情形。金田村大股逆匪。經此次痛加擒勦。大挫賊鋒。正可乘勢激勵將士。直抵賊巢。不難立就撲滅。惟賊股甚多。分擾各屬。難保不暗通消息。彼此互為救援。以為牽掣我師之計。重兵均駐金田。各屬兵力頗形單弱。該大臣等務當通盤籌畫。嚴飭各屬文武將弁。合力兜擒。勿致顧此失彼。逆首韋正。韋元。洪秀泉。及各股匪首等。尤宜設法偵獲。勿令乘間竄逃。李星沅。周天爵。向榮。皆朕特簡大員。深資倚畀。前降諭旨。殷殷訓勉。無非推心置腹之誠。諒諸臣必能協力同心。和衷共濟。以紓朕南望焦思也。勉之望之。將此由五百里各諭令知之。○又諭廣西

現在軍務未竣。尚須添兵協勦。著張亮基。喬用遷。於雲貴兩省。各選精兵一千名。派定將弁管帶。俟欽差大臣李星沅等。咨調到日。即飭迅速馳赴廣西。聽候調度。並著駱秉章。於湖南省各營內。豫選精兵。咨詢李星沅等。應調若干名。即派將弁管帶前往。將此由五百里各諭令知之。○以勦辦廣西金田逆匪獲勝。賞提督向榮。巴圖魯名號。予陣亡武舉李祥麟。賞卹如例。○以廣西明江。河池。龍甯。明廳。州各城被賊竄陷。革同知恆椿。知州鄧樹榮。吏目張文棟。朱濂。都司羅起龍。守備李陞榮。千總何光燦。把總劉克成。外委蔡榮尊。黃現達。劉鳳懷。李崢發職。○緩徵廣西全省本年額賦。○壬午。

上詣

壽康宮問

皇貴太妃安。○江蘇巡撫傅繩勳因病解任。以江甯布政使楊文定為江蘇巡撫。調湖南布政使祁宿藻為江甯布政使。以湖北按察使椿壽為湖南布政使。科布多參贊大臣瑞元為湖北按察使。○賞湖南辰州府知府色克通額頭等侍衛。為科布多參贊大臣。○癸未。

孝昭仁皇后忌辰。遣官祭

景陵。○甲申。

上詣

壽康宮問

皇貴太妃安。○遣官祭賢良祠。○諭內閣奕格等奏喀爾喀貝子齊克都爾扎勒所屬之烏梁海人等每年呈進該貝子皮張。請旨仍照舊章。派委官兵往收一摺。齊克都爾扎勒游牧距烏梁海游牧較遠。所有每年應交皮張。若責成烏梁海人等解送。沿途未免拮据。著加恩將該烏梁海人等每年應進皮張。仍照從前派委官兵往收。以示體恤。該委員兵丁等如有夾帶貨物。私行售賣。不安本分情弊。不止將該官兵等嚴行治罪。並將該貝子齊克都爾扎勒議處。○定郡王載銓等奏。會議湖北清查一案。計虧短正項雜捐。及米穀折價。共銀

四十六萬八千有奇。請飭湖廣總督。湖北巡撫。遵照奏定章程。迅速嚴追。從之。○烏魯木齊都統毓書奏。上年密陳各大臣考語。接奉硃批。指飭。惶懼莫知所措。得旨。嗣後惟當益加勉勵。不在奏謝之虛文也。○以勦辦廣東靈山石城等處賊匪。獲勝。賞遊擊玉山。何萬興。都司饒成龍。守備饒永福。花翎。○以喀喇沙爾續墾地畝升科。予章京常壽等優敘。○乙酉。諭內閣。楊殿邦奏。浙省兌漕遲延情形。又片奏。蘇松等屬亦未兌足等語。本年新漕。前經飭令提前趕辦。必須早兌。早開。方能依限北上。乃據奏稱。浙江有漕各屬。因有查豁積欠。思旨。民間未諳定例。以致徵兌遲延。江蘇蘇松太三屬。亦未據

報兌竣。向來查辦積欠。未屆奏銷者。不准豁免。例有明文。前已明降諭旨。通飭曉示。各省接奉後。諒已明白。示諭。新漕自必踴躍輸將。至漕船兌足開行。全在各官吏經理得宜。迅速催趲。始得進行無誤。豈容藉口耽延卸責。著江蘇浙江巡撫。嚴飭各州縣。將起運漕糧。趕緊交幫受兌。立即開行。並會同該漕督。督率各該糧道。分飭縣幫。一切妥速辦理。儻有遲誤。查明係何縣何幫。即行指名嚴叅懲辦。其江廣漕船。並著沿途各督撫。一體飭屬催提。及早抵淮。以速漕行。而符例限。○諭軍機大臣等。前據劉韻珂。徐繼畬奏。接據琉球國來文。以喚夷咱噠吟。住居伊國。仍未撤回。籲請查辦。朕以琉球恪守

藩封。夙稱恭順。頻來呼籲。未便置之不問。當經降旨。令徐廣縉再向叻。設法開導。並於本年禮部據呈代奏時。復令該督曉諭夷酋。令其撤回。茲據徐廣縉奏稱。叻。僅在中國為公使。並非暎夷所有之事。悉聽命於該酋。從前劉韻珂。咨會之時。叻。曾經設詞推諉。未便再行照會等語。該督仍當隨時體察情形。加意控馭。揆幾度務。原不在多費詞說也。將此諭令知之。○又諭。朕聞邪教流傳。蔓延數省。河南祥符縣有吳光漢。偽稱赤天大王。四川綦江縣有馬武成。偽稱赤地大王。廣東英德縣有李三文。偽稱赤人大王。均為各省邪教總目之首。此外總目尚復不少。其教與天主教同宗一派。暎夷

在粵散布頭目。勾結黨與。且有內地革紳王如繼。張懷亮。匪徒徐繼龍等。附彼助謀。至邪教頭目所住地方。其徒充當衙役。為之探事。差弁查拏。先通消息。一時未能緝獲。似此邪教蔓延。若不豫為之防。勢必釀成巨案。著徐澤醇。徐廣縉。葉名琛。潘鐸等。遴委妥員。不動聲色。嚴密偵訪。如查有傳教各頭目。及包庇串通之衙蠹。迅即掩揜。研究徒黨。咨行鄰省。一體訪拏懲辦。以杜其勾結之漸。至保甲清賊匪之源。團練備守禦之法。該地方官果能實力奉行。何至匪徒潛相煽誘。各該督撫。總當弭患未然。勿致養癰貽害。但須持以慎密。不可稍涉張皇。轉滋擾累。將此各諭令知之。○山西巡撫兆那蘇圖。

以辨理清查未善。奏謝降級留任。思得旨。多慧係汝所明保之人。朕以汝平日尚屬認真。故從寬僅予降留。乃不知倍加感激。於摺內仍照例數語。昧良負恩。莫此為甚。朕尚可欺。天豈可欺乎。嗣後爾若能盡改前愆。庶可仍邀眷遇。若自甘暴棄。復蹈故轍。則革職逮問矣。朕近聞汝好與朝臣交往。甚屬卑鄙。有則改之。無則加勉。此係朕所聞。特諭汝知。非罪汝也。正愛汝也。○丙戌。

上詣

壽康宮問

皇貴太妃安。○諭內閣。朕每日御殿召見內外大小臣工。詢事

考言。固以通上下之情。尤當防漏洩之漸。

皇考宣宗成皇帝。前曾特頒

硃諭。飭令豫備次起召對之人。及奏事處帶領之總管首領太監等。俱著在廊下祇候。不准擅進明殿。

聖訓昭垂。寓有深意。上年因冬令嚴寒。諸臣分起進內。待召需時。暫令在懋勤殿旁屋祇候。以示體恤。惟思該處係裏邊太監執事之所。語言交接。易啟囑託之漸。若輩行為。何所不至。所關非淺。著內務府於乾清宮西階下之西。添設板棚一座。嗣後豫備召對之大小臣工。即令在棚內憩息。藉蔽風雨。於挨次召見。亦可不致遲誤。並著御前大臣。軍機大臣等。隨時

留心稽查。凡召見引見官員人等。概不准與太監接談交涉。在諸臣各知自愛。當不至故違訓誡。自蹈愆尤。儻太監等有不遵約束者。即著該大臣等指名奏參。加等治罪。此旨著軍機處。奏事處。上書房各存記一道。○又諭。據兵部奏。甘肅西甯鎮總兵薩炳阿。上年差派把總趙勝等帶兵六名。赴永安一帶探野番蹤跡。把總趙勝及兵丁二名。均被賊戕害。僅據陝甘總督咨部等情。該鎮薩炳阿。遊擊朱成貴。都司張順等。職任巡防。於把總被戕之後。並不發兵追勦。輒以該弁輕率自取等詞具稟。該督又不將被戕官兵題奏。僅以咨部了事。顯有不實不盡。著琦善確切查明賊匪戕官。並不親身追勦。

之總兵以下各官。據實嚴參。並將被戕官兵造冊具題覈辦。勿稍含混。○諭軍機大臣等。奕興奏。遵查奉天海疆情形。請籌款添設船礮。以資防捕一摺。據稱奉天洋面。上年商船疊次被劫。因山東捕拏嚴緊。竄入北洋。當即委令水師營弁。前往山東訪求緝捕之法。並與山東巡撫陳慶偕。往返札商。講求辦理。現已仿照山東章程。添造開風船二隻。廣艇船二隻。連礮位器械。並招募水勇。責成金州副都統。督率駕馭等語。該將軍既與陳慶偕札商籌議。自應不分畛域。同心協力。會商妥辦。惟奕興所稱新添船械。查照山東辦法。飭令黃富興。就近在廣東代為招募製辦。仍派員往粵。會同駛回奉天一

節。是否可期。濟用。不至往返需時。有誤事機。又所稱統計經費。約需銀五萬兩。暫由盛京戶部庫項借用。另片奏。奉天海口。每到商船一隻。勸捐銀一兩。約計十數年。即可補足一節。盛京本無閒款可籌。勸捐易滋流弊。此項所需。本省有無另款。可以協濟。著陳慶偕一併會議。即作正開銷。亦無不可。奕興原摺片。均著鈔給陳慶偕閱看。將此各諭令知之。○兩廣總督徐廣縉等奏。營弁妄拏良民。誣指為盜。請將外委石鈺福。殷亮明革職。發新疆效力。及始終回護之都司吳榮邦。交部嚴議。從之。○以頭等侍衛輔國將軍載堪。為乾清門侍衛。○調正白旗漢軍副都統瑞昌。為金州副都統。以馬蘭鎮總

兵官慶錫。為正白旗漢軍副都統。○以廣東拏獲洋盜多名。賞參將黃開廣花翎。千總李新明藍翎。○丁亥。以攻毀廣西金田賊巢。賞知府劉繼祖花翎。總兵官李能臣等。下部議敘。○以廣西橫山追賊失利。遊擊馬芳春。都司麻長慶。革職留任。陣亡武舉黃彥彩。賞卹如例。○舉行道光三十年大計。奉天。才力不及官一員。直隸。卓異官十六員。罷輟官一員。才力不及官一員。年老官四員。有疾官二員。熱河。卓異官一員。浙江。卓異官十一員。不謹官二員。才力不及官三員。年老官三員。福建。卓異官七員。不謹官一員。罷輟官一員。浮躁官一員。才力不及官一員。年老官五員。安徽。卓異官五員。不謹官四

員。罷輒官一員。浮躁官二員。才力不及官一員。年老官二員。湖北卓異官十員。不謹官四員。罷輒官一員。浮躁官一員。才力不及官一員。年老官二員。有疾官二員。湖南卓異官十員。不謹官二員。罷輒官一員。年老官五員。山東卓異官十三員。不謹官一員。才力不及官三員。年老官五員。山西卓異官十二員。才力不及官二員。年老官四員。有疾官三員。甘肅卓異官七員。才力不及官一員。年老官二員。有疾官一員。廣東卓異官十二員。不謹官三員。罷輒官二員。才力不及官二員。年老官六員。有疾官二員。四川卓異官十四員。不謹官六員。才力不及官四員。年老官三員。有疾官二員。貴州卓異官七員。

罷輒官一員。才力不及官二員。年老官三員。河南卓異官十一員。不謹官一員。才力不及官三員。年老官二員。有疾官一員。南河卓異官一員。年老官一員。有疾官一員。東河卓異官一員。年老官一員。有疾官一員。分別議敘處分如例。

大清文宗協天翊運執中垂謨懋德振武聖孝淵恭端仁寬敏
顯皇帝實錄卷之二十八

實錄卷之二十八

七

